

**TEZAU LITURGIC**  
**13 IANUARIE**

**ACATISTUL**  
**SF. CUVIOS**  
**ELEAZAR**  
**DE LA ANZER**  
**II**



**MOSCOVA, 2000**



**Акафист**  
**святому преподобному**  
**Елеазару, Анзерскому**  
**Чудотворцу**

**Кондак 1**

Избранного Божия слугителя, преславного  
строителя и управителя скита Анзерского во  
многих чудесах возсиявшего и за люди  
православныя ныне на небесах усердно  
Господеву молящагося, похвальными песнями  
почтим, зовущее: Радуйся, преподобне Елеазаре,  
Анзерский Чудотворче.

**Икос 1**

Ангелом земным, прославленным угодником  
Божиим, поревновал еси, Преподобне, духа  
молитвы, смиренномудрия и воздержания  
стяжавый от юности, еще в дому родителей  
твоих, от них же восприял еси благочестия образ  
и благословение изыти в страны северныя,  
обитель Соловетскую. Сего ради с любовью  
взываем ти:

Ра́дуйся, гра́да Козе́льска Богои́збра́нное ча́до;  
ра́дуйся, роди́телей благо́честивых ра́досте и  
утеше́ние. Ра́дуйся, от младе́нчества Христа  
возлю́бивый; ра́дуйся, от ю́ности до́бре Тому  
послужи́вый. Ра́дуйся, дом и град оте́ческий  
оста́вивый; ра́дуйся, го́рняго Иеру́сали́ма  
пла́менне взыска́вый. Ра́дуйся, бога́тство и  
ра́дости ми́ра сего́ возненави́девый; ра́дуйся, на  
подвиг и́ноческий благо́словение от  
Боголю́бивых роди́телей прие́мый. Ра́дуйся,  
преподо́бне Елеа́заре, А́нзерский Чудо́тво́рче.

### **Кондак 2**

Ви́дя игу́мен Ирина́рх ре́вностное по Бо́зе жити́е  
твое, Елеа́заре, поще́ние, непреста́нную моли́тву  
и в послуша́нии усер́дное терпе́ние возлю́би́ ты,  
яко и́стиннаго и́нока Бо́жия, и чину́ А́нгельскому  
сопричте́ ты, ра́дуясь и Бо́гу о тебе́ вопи́я:  
Аллилу́я!

### **Икос 2**

Ра́зум Богомы́сленный име́я, не ища́ сла́вы  
тле́нной, но и́стинному Богоуго́ждению прилежа́,  
прия́л еси́ от игу́мена благо́словение оста́вити  
оби́тель Солове́цкую и пресели́тися на остров  
пусты́нный А́нзерский. Мы же ре́вности твое́й о  
спасе́нии дивя́щися, зове́м ти: Ра́дуйся,  
пусты́ннаго жити́я ревни́телю; ра́дуйся, убо́гой

хижины смиренный обитателю. Радуйся, гласа  
человеческаго многая не слышивый; радуйся,  
единых зверей дивных и птиц сожителю.  
Радуйся, тяжкими трудами и лишениями плоть  
свою изнуривый; радуйся, ночным бдением и  
молитвою дух свой укрепивый. Радуйся, яко  
сподобился посещения Царицы Небесной;  
радуйся, яко от Нея четки и трость приял еси.  
Радуйся, преподобне Елеазаре, Анзерский  
Чудотворче.

### Кондак 3

Силу на течение подвижническаго жития даруя  
ти, Пресвятая Богородица: Дерзай и крепись,  
яко с тобою Господь! Также повеле начертати на  
двери келии твоей: Христос с нами уставися.  
Еже сотворив по слову Ея, воспел еси Богу:  
Аллилуйя!

### Икос 3

Имуще в памяти образ древних  
пустынножителей, иже пропитание себе деюще  
трудами рук своих, также и ты, святой Елеазаре,  
творил еси сосуды деревяны, ихже полагал еси  
на бресе морstem, и мимоходящи на кораблех  
купцы, вземлюще я, оставляху хлеб и  
пропитание невидимому труднику Божию: ни  
ты бо, Отче, ни оныя лица друг друга зряху.

Семú образу пропитанія твоего умиляющесе,  
воспеваем ти сице: Радуйся,  
подвигоположником монашества уподобивыйся;  
радуйся, от трудов рук твоих питавайся.  
Радуйся, утайвый лице свое пред людьми мира  
сего; радуйся, безмолвия своего не нарушивый  
сретеніем человека. Радуйся, удаливыйся бегая  
соблазнов и в пустыни водворивыйся; радуйся,  
чающий Бога, спасающего от малодушия и бури.  
Радуйся, иго Христова на рамена восприемый;  
радуйся, бремя Его легкое чрез все житие свое  
пронесый. Радуйся, преподобне Елеазаре,  
Анзерский Чудотворче.

#### Кондак 4

Бури напастей житейского моря бежавый и к  
тихому пристанищу притекий подвижник  
Соловецкий Фирс срете тя, святыи Елеазаре, в  
пустыни твоей и постриже тя в схиму, юже  
приимше, умножил еси труды и бдения твоя,  
денно и ночью поя Богу: Аллилуйя!

#### Икос 4

Слышаще человецы пустыннолюбивии доброту  
красную жития и подвигов твоих, Преподобне,  
притекоша к тебе, просяще окормления на пути  
спасения души. Ты же, святыи Елеазаре, не  
отринул еси жаждущих тесными вратами в

Ца́рствие Небе́сное вни́ти, и та́ко созда́ся скит  
А́нзерский, в нем же па́стырем и наста́вником  
был еси́ словесных твоих овец, взыва́ющих к  
тебе такова́я: Ра́дуйся, до́брый мона́хов  
наста́вниче; ра́дуйся, дивный А́нгелов  
собесе́дниче. Ра́дуйся, в по́двизех вели́ких о́браз  
исти́ннаго мона́шества показавый; ра́дуйся,  
тяжкими вери́гами и пощени́ем плоть свою́  
умертви́вый. Ра́дуйся, телесными труда́ми  
бра́тии послужи́вый; ра́дуйся, мно́гия  
священны́я кни́ги для бра́тии руко́ю твоёю  
написа́вый. Ра́дуйся, светоза́рными виденьми  
мно́гажды от Цари́цы Небе́сныя дивная  
обетова́ния прие́мый. Ра́дуйся, преподо́бне  
Елеа́заре, А́нзерский Чудотво́рче.

### Кондак 5

Боготечно́ю звездо́ю возсия́л еси́, Елеа́заре, не  
то́кмо на острова́х Солове́цких, но и в се́рдце  
Ру́сския земли: не мо́жет бо град укрепи́ться на  
верху́ горы́ стоя́ше, ниже́ свеща́ на све́щнице  
возже́нная! Та́ко и тебе́, пустыннолю́бче,  
си́льнии ми́ра се́го позна́ша и умили́вшееся  
сердца́ми свои́ми, Богу́ воспéша: Аллилу́я!

### Икос 5

Ви́дя патриа́рх Филаре́т жела́ние се́рдца твоего́  
и сподви́жников твоих, Елеа́заре, повеле́

воздвигнути на острове Анзерстем храм во Имя Святыя Живоначальныя Троицы, последи же и бремя управления братством скитским возложи на тя, Преподобне отче, аще сего и уклонялся еси. Мы же видяще процветание обители твоея, радостно взываем сице: Радуйся, малое твое стадо добре управляяй; радуйся, великих в нем мужей воспитавай. Радуйся, Никона, патриарха всея Руси, в среде братии твоей имевый; радуйся, до конца живота другом его возлюбленным пребывай. Радуйся, злоумышленных от пути погубельнаго отвративый молитвою твоею; радуйся, злое намерение покаившимся простивый. Радуйся, козни врага диавола победивый смирением твоим; радуйся, крепость того низложивый молитвою Иисусовой. Радуйся, преподобне Елеазаре, Анзерский Чудотворче.

### **Кондак 6**

Проповедник силы Божия явился еси, Преподобне Елеазаре, егда предрекл еси рождение сына царева Алексия. Сему же пророчеству сбывшуся, возопиша вси к прославленному ты Богу: Аллилуйя!

## Икос 6

Воссия́л еси, яко свети́ло доброзра́чное на небе полуно́щнем, блаже́нне Елеза́ре, луча́ми благода́ти Госпо́дней, оби́льно ти даро́ванной, просвеща́я души паствы́ твоей, вопи́ющей ти тако́вая: Ра́дуйся, любви́ к Богу́ и бли́жнему неуста́нный учи́телю; ра́дуйся, ча́д твоих духо́вных мудры́й окормите́лю. Ра́дуйся, презира́ти блага́ ми́ра сего́ внуша́яй; ра́дуйся, о душе́, вещи́ безсме́ртней, прилежа́ти науча́яй. Ра́дуйся, си́лу Бо́жию в ви́де голу́бине над гла́вами досто́йных ино́ков зрети́ сподо́бивыйся; ра́дуйся, согрешивша́го брата́ Тихо́на крото́кое вразумле́ние. Ра́дуйся, А́нзерскаго скита́ крото́кое забра́ло; ра́дуйся, дивна́я того́ похлаво́ и слава. Ра́дуйся, преподо́бне Елеа́заре, А́нзерский Чудотво́рче.

## Кондак 7

Хотя́ укрепити́ оби́тель твою́, Преподо́бне отче, яви́ся ти в це́ркви Святы́я Трои́цы Пресвята́я Богоро́дица и рече́: Храните́ за́поведи Христо́вы и устро́те храм во имя́ Моё́. Слы́ша же сия́ возрадовался еси́ ра́достью вели́кою, Го́споду Бо́гу поя́: Аллилуйя!

## Икос 7

Но́вая ка́менная церковь Зна́менія Пресвяты́я Богородицы устройся твоими, Преподобне Строителю, трудами и по́ты, и многими скорбями, ихже претерпел еси мужественно, силою Вышняго укрепляемь. Сего ради зовем ти: Радуйся, блаженне, неправедое гонение понесый; радуйся, в терпении душу свою стяжавый. Радуйся, гласом небесным на пути скорбей укрепленный; радуйся, страданием дивно просветленный. Радуйся, яко твоими трудами храм Пречистей Богоматери устройся; радуйся, яко братия Анзерская о сем возвеселися. Радуйся, сеяй многими слезами; радуйся, с радостию вземляй рукояти своя. Радуйся, преподобне Елеазаре, Анзерский Чудотворче.

## Кондак 8

Странен и непостижим чадом мира сего образ всего твоего жития явися: от юности бо отрелся еси благ тленных, яже человецы взыскуют, лета младыя в уединении на острове дивним иждивый в подвизах тяжцех, в старости мастите таже покоя телеснаго не имевый. Мы же любовию чтуще память твою, Елеазаре, яко вернаго раба Гоподня, о тебе Богу поем: Аллилуйя!

## Икос 8

Весь был еси Христов, Елеазаре, восходя́ от силы в силу лѣствицею добродетелей, и приближившись ко исходу твоему, благословил еси возлюбленная чада твоя, иноки А́нзерския, вручив о́ная другу и сподви́жнику твоему Никодиму́, и тако с миром отошел еси ко Господу. Взирáюще же на блаженную кончину твою, зовѣм ти таковая: Радуйся, Христа Бога ра́бе благий и верный; радуйся, призванный от но́щи жития тленного в свет невечерний. Радуйся, добре потрудивыйся в винограде Господа твоего; радуйся, праведную за сие мзду приѣмый. Радуйся, от перваго часа́ порабо́тавший; радуйся, светильник от юности до послѣднего дне твоего неугасим соблюды́й. Радуйся, с ним во врата жизни вечныя лику́я вшедый; радуйся, от сонма друзей твоих небесных в веселии прия́тый. Радуйся, преподобне Елеазаре, А́нзерский Чудотворче.

## Кондак 9

Вси в житии сем крест яко ярем взявшии и Христу Богу послѣдовавшии верою прии́мут венцы нетленные и почести небесныя, имже приобщивыйся, смиренне Елеазаре, пред

престолом Вседержителя Бога присно  
воспеваеши: Аллилуйя!

### Икос 9

Витийствующий суемудренно ум не возможет постигнуть, како праведник и по смерти живет, святым покровом молитвы защищая верных от всяких бед и напастей. Иноцы же Анзерстии, удостоенныя многожды видети чудеса, святым Елеазаром по смерти явленныя, взываху чистым сердцем и умом смиренным сицевая: Радуйся, Елеазаре, в болезнех безмездный врачу; радуйся, иеромонаха Измаила недугующа исцеливый. Радуйся, лишившемуся ума иноку Онуфрию здравый смысл возвративый; радуйся, явлением твоим многих возвеселивый. Радуйся, живописцу иноку Макарию представый; радуйся, яко той видением твоим вразумися, како икону твою изобразити. Радуйся, строителя Исаию от потопления спасый; радуйся, бедствующим в плавании путь к обители сотворивый. Радуйся, преподобне Елеазаре, Анзерский Чудотворче.

### Кондак 10

Спасти хотя иноки, плавающая на льдине в  
нощи и близ потопления сущия, явился еси им  
отче Елеазаре, на краю сея льдины стоя и

управляя путь ея ко брѣгу А́нзерскому. Тии же, видящее спасение свое, прославиша тя, заступника своего, радостно Богу вопиюще: Аллилуйя!

### **Икос 10**

Стена был еси скиту А́нзерскому, его же возлюби душа твоя, преподобне Елеазаре, в немже толикия труды и скорби понесый, толикия благодати исполнился еси. О сем же веселящися, вернии ученицы́ твоя воспеваху ти сице: Радуйся, в житии своем скит создавый и снабдевавый е; радуйся, по кончине своей того не оставляяй. Радуйся, о нем непрестанный ко Господу молитвенниче; радуйся, и всякой души Христианстей в скорбех помощниче. Радуйся, притекающих к тебе с верою и любовию не отвергаяй; радуйся, токи благодати Божией неоскудно источаяй. Радуйся, земный Ангеле и небесный человеце; радуйся, горняго вертограда крине неувядаемый. Радуйся, преподобне Елеазаре, А́нзерский Чудотворче.

### **Кондак 11**

Пение всеумилѣнное принесем Христу Богу нашему, грешнии и смиреннии, о даровании великого Его угодника Елеазара, не токмо скиту

А́нзерскому, но и всему роду православному,  
благодарне вопиюще: Аллилуйя

### **Икос 11**

Светозарна светильника, святы́й Елеазаре, яви  
тя Господь, в житии́ твоём дивных видений  
сподобивый́ ты, по кончине́ же твоей чудес  
дарованием ты прославивый, еще́ же и тело́ твое  
святое нетленно сохранивый; его́ же обрѣ́тение  
радостно почитаем, поюще: Радуйся, душою  
безсмертною веселя́йся в обителях радости;  
радуйся, телом проповеду́яй нетление святых  
мощей. Радуйся, яко дар многоценный́ тело́ твое  
скиту оставивый; радуйся, к ра́це мощей твоих  
притекающих скорый послушниче. Радуйся,  
иноков благонадежное прибежище; радуйся, в  
ми́ру спасающих помощь и укрепление.  
Радуйся, неусыпный о нас молитвенниче;  
радуйся, за нас грешных теплый пред Богом  
заступниче. Радуйся, преподобне Елеазаре,  
А́нзерский Чудотворче.

### **Кондак 12**

Благодать Святаго́ Духа обильно изли́яся на ты,  
блаженне Елеазаре, его́же главы́ невидимых  
змиёв победив, стадо́ твое́ добре управил еси́, и  
все течение́ жизни́ твоея́ непорочно́ соблюл еси́ и

восшед в радость Господа твоего, радуясь, поеши Ему: Аллилуйя!

### **Икос 12**

Поюще подвиги многотруднаго жития твоего, мысленно обтекаем путь твой от малых лет до смертнаго одра твоего, зовущее ти сице: Радуйся, рабе Божий смиренный; радуйся, служителю Его благий и верный. Радуйся, монахов радости; радуйся, среди мира живущих рабов Божиих благоговейное удивление. Радуйся, скорби сладце терпевый; радуйся, венец победы стяжавый. Радуйся, небесных веселие; радуйся, земных отрадо. Радуйся, преподобне Елеазаре, Анзерский Чудотворче.

### **Кондак 13**

О, дивный и светлый заступниче, Елеазаре блаженне! Прими от нас недостойных сии малые дары, тебе от чистого сердца приносимыя; сохрани, благослови и от всяких бед избави сильною твоею молитвою отеческий град твой Козельск и люди живущия в нем, иже собравшиися во святем храме сем, чтуще честную память твою, воспевающее о тебе Богу: Аллилуйя! (Трижды).

## Молитва

О, святы́й Елеазаре, преподобне отче наш! Ныне на небесе́х с го́рными силами лику́яй, приклони светозарное лице твое к нам, в но́щи многоскорбнаго жития сего су́щим; воспомяни́ во святы́х молитвах твоих пред престолом Господа Сил град твой Козельск, идеже процвете́ младенчество и непорочная юность твоя. Сохрани, защити и ко спасению упра́ви нас, сородичей твоих, чту́щих святое равноангельское житие твое. Не остави нас на пути земна́го нашего странствия, и в час кончины нашей избави от темных и злых духо́в и невозбранно сподоби нас вни́ти в чертог славы пренебесной, да с тобою купно восхва́лим Пресвятую и Живоначальную Троицу в безконечныя веки. Аминь.

